

25/05/1999

Pak Lah persoal program Pas

PETALING JAYA, Isnin - Datuk Seri Abdullah Ahmad Badawi hairan mengapa baru sekarang Pas membentuk Urusetia Hal Ehwal Masyarakat Cina bagi meraih sokongan masyarakat bukan Islam, sedangkan pilihan raya bukan baru di negara ini.

"Orang Cina sudah berada di Malaysia sejak pilihan raya pertama diadakan. Politik orang Cina juga ditentukan orang Cina sendiri, bukan ditentukan sebab kita akan membuka sekretariat.

"Mereka sudah lama di sini, sudah faham politik di sini. Mereka tahu apabila hendak membuang undi. Mereka pasti akan pilih yang baik untuk masa depan Malaysia dan rakyat, termasuk kaum mereka," kata nya selepas melancarkan buku A New Deal For Asia yang ditulis Perdana Menteri, Datuk Seri Dr Mahathir Mohamad, di sini, hari ini.

Abdullah diminta mengulas cadangan Pas menubuhkan Urusetia Hal Ehwal Masyarakat Cina bagi merangka dan melaksanakan program untuk meraih sokongan masyarakat bukan Islam sebagai persiapan menghadapi pilihan raya umum akan datang.

Presiden Pas, Datuk Fadzil Noor, ketika mengumumkan perkara itu Sabtu lalu, juga tidak menolak kemungkinan pembentukan urusetia berkenaan akan menjadi asas kepada cadangan parti itu untuk menerima masyarakat bukan Islam menyertai Pas.

(END)